

PEMBERITAHUAN PERTANYAAN BAGI JAWAPAN BUKAN LISAN

MESYUARAT KETIGA, DEWAN RAKYAT

PENGGAL KEEMPAT, PARLIMEN KETIGA BELAS

MAJLIS MESYUARAT DEWAN RAKYAT

PERTANYAAN : JAWAB BUKAN LISAN

DARIPADA : DATO' HASBULLAH BIN OSMAN [GERIK]

TARIKH : 17 OKTOBER 2016 (ISNIN)

SOALAN :

DATO' HASBULLAH BIN OSMAN [GERIK] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah usaha pihak Kementerian dalam membendung masalah penderaan kanak-kanak daripada terus berlaku dan apakah langkah-langkah yang diambil untuk mengelakkan kanak-kanak ini terasa terabai dan mengalami trauma atau tekanan perasaan.

JAWAPAN: YB DATO' SRI ROHANI ABDUL KARIM, MENTERI
PEMBANGUNAN WANITA, KELUARGA DAN
MASYARAKAT

Tuan Yang Dipertua,

Kementerian Pembangunan Wanita, Keluarga dan Masyarakat melalui agensi-agensinya di bawahnya telah melaksanakan pelbagai usaha dalam membendung masalah penderaan kanak-kanak daripada terus berlaku. Antara tindakan yang telah dilaksanakan adalah seperti berikut :

1. Pindaan terhadap Akta Kanak-Kanak 2001

Pindaan terhadap Akta Kanak-Kanak 2001 telah diluluskan di parlimen pada Mei 2016 dan kini dikenali sebagai Akta Kanak-Kanak (Pindaan 2016). Pindaan ini meliputi pengenalan kepada dasar-dasar baru yang berkaitan dengan kanak-kanak, menaikkan hukuman bagi kesalahan yang melibatkan kanak-kanak dan penambahbaikan dalam aspek pengurusan kes kanak-kanak yang memerlukan perkhidmatan seperti pemeliharaan, perlindungan dan pemulihan.

Antaranya adalah meningkatkan hukuman kepada mereka yang melakukan penganiayaan atau mendedahkan kanak-kanak hingga menyebabkan kanak-kanak mengalami kecederaan fizikal, emosi atau seksual di bawah Seksyen 31(1) Akta Kanak-Kanak 2001.

2. Majlis Penyelaras Bagi Perlindungan Kanak-Kanak

Bahagian II Akta Kanak-Kanak 2001 juga memperuntukkan penubuhan Majlis Penyelaras Bagi Perlindungan Kanak-Kanak untuk menasihati Menteri tentang aspek perlindungan kanak-kanak. Seterusnya Majlis ini mewujudkan Pasukan Perlindungan Kanak-Kanak (PPKK) yang dianggotai oleh seorang Pelindung (Pegawai Kebajikan Masyarakat) sebagai pengerusi, pegawai perubatan, pegawai kanan polis serta anggota masyarakat yang prihatin terhadap isu sosial yang melibatkan kanak-kanak. Fungsi utama PPKK adalah untuk menyelaras perkhidmatan setempat kepada keluarga dan kanak-kanak jika kanak-kanak memerlukan atau disyaki memerlukan perlindungan. Pada masa ini terdapat 133 buah PPKK di seluruh negara.

3. Dasar Perlindungan Kanak-Kanak

Kerajaan telah menggubal Dasar Perlindungan Kanak-Kanak pada bulan Julai 2009 untuk memastikan kanak-kanak mendapat perlindungan sewajarnya. Dasar ini turut memastikan komitmen menyeluruh diambil oleh semua pihak, termasuk ibu bapa atau penjaga kanak-kanak dalam melindungi kanak-kanak khususnya daripada sebarang bentuk keganasan mental dan fizikal, kecederaan, pengabaian, penderaan atau eksploitasi dengan menyediakan persekitaran yang selamat dan mesra kanak-kanak.

4. Pusat Aktiviti Kanak-Kanak

Selain itu, Pusat Aktiviti Kanak-Kanak (PAKK) telah ditubuhkan bagi menyediakan perkhidmatan sokongan dan advokasi kepada keluarga dan kanak-kanak berisiko tinggi dalam aspek penderaan dan pengabaian. Kini terdapat 149 PAKK di seluruh negara yang mana sehingga Jun 2016 telah mencatat kehadiran seramai 23,005 kanak-kanak. PAKK menyediakan program berbentuk seminar, kursus dan bengkel serta intervensi yang berbentuk motivasi, bimbingan kaunseling dan sukan.

5. **Rumah Kanak-Kanak**

Bagi kanak-kanak yang menjadi mangsa dera, JKM turut menyediakan tempat perlindungan bagi kanak-kanak yang menjadi mangsa penderaan. Sehingga kini terdapat 13 buah Rumah Kanak-Kanak di seluruh negara.

6. **Pasukan Pencegahan Penganiayaan dan Pengabaian Kanak-Kanak (SCAN TEAM)**

Selain itu, kerajaan telah memperkenalkan *Scan Team* di 34 buah hospital kerajaan di seluruh negara. Pasukan ini berperanan khusus untuk mengendalikan kes penderaan dan penganiayaan kanak-kanak dan dilaksanakan di hospital Kementerian Kesihatan Malaysia yang mempunyai Pakar Pediatrik.

7. **Program Advokasi**

Bagi mengukuhkan usaha untuk menangani masalah penderaan kanak-kanak, KPWKM melalui JKM dan Lembaga Penduduk dan Pembangunan Keluarga Negara (LPPKN) telah melaksanakan pelbagai program advokasi kepada masyarakat di semua peringkat

dengan kerjasama agensi-agensi kerajaan yang lain dan NGO. Kerajaan telah mengenal pasti beberapa punca utama terjadinya kes penderaan kanak-kanak seperti perbalahan antara keluarga, kekurangan kemahiran keibubapaan, tekanan kewangan dan lain-lain lagi. Sehubungan itu, program advokasi telah direka bagi tujuan mengurangkan penderaan kanak-kanak dalam masyarakat. Antara program yang telah dilaksanakan ialah:

- i) **Kursus Pra perkahwinan SMARTSTART LPPKN.** Kursus ini telah dilaksanakan dengan melibatkan penyertaan seramai 24,470 peserta dari tahun 2006 hingga Disember 2015. Program ini dijalankan dengan kerjasama Jabatan Pendaftaran Negara, NGO dan badan-badan agama.

- ii) **Program Keluarga@Kerja (*Parenting@Work*).** Sebanyak 748 program telah dilaksanakan dari tahun 2008 hingga Disember 2015 dengan melibatkan penyertaan seramai 31,422 orang ibu bapa. Program ini dijalankan dengan kerjasama agensi kerajaan seperti FELDA dan Kementerian Tenaga, Teknologi Hijau dan Air (KeTTHA), pihak swasta seperti Maybank dan

Tenaga Nasional Berhad (TNB) serta NGO seperti Majlis Perundingan Pertubuhan Islam Malaysia (MAPIM).

- iii) **Kursus Ilmu Keluarga@LPPKN**. Sebanyak 12,674 kursus telah dilaksanakan pada tahun 2008 hingga Disember 2015 dengan melibatkan penyertaan seramai 1.43 juta orang peserta.

- iv) **KPWKM** sentiasa menjalinkan bekerjasama dengan Kementerian Pendidikan untuk melindungi kanak-kanak di Malaysia. Dalam hal ini, LPPKN telah membangunkan program **PEKERTI@Sekolah** berdasarkan Pelan Tindakan Dasar Pendidikan Kesihatan Reproduktif dan Sosial Kebangsaan bagi peringkat sekolah rendah dan menengah. Program ini dilaksanakan sebagai aktiviti kokurikulum di sekolah-sekolah yang dipilih oleh Kementerian Pelajaran. Modul yang digunakan antara lain memberi pengetahuan akan bahaya dan risiko salah laku seks. Pelajar yang terlibat adalah murid Tahun 6 iaitu selepas peperiksaan UPSR, dan pelajar Tingkatan 3 iaitu selepas peperiksaan PMR dan pelajar Pendidikan Khas.

Hingga Disember 2015, seramai 10,025 orang murid telah mengikuti program rintis ini.

Bagi mengelakkan kanak-kanak ini terasa terabai dan mengalami trauma atau tekanan perasaan, KPWKM turut menyediakan perkhidmatan kaunseling kepada kanak-kanak bagi membantu mengukuhkan emosi dan psikologi kanak-kanak. Dalam hal ini seramai 183 orang Pegawai Psikologi di Jabatan Kebajikan Masyarakat (JKM), 2 orang Pegawai Psikologi di Jabatan Pembangunan Wanita (JPW), 16 orang Pegawai Psikologi di Lembaga Pembangunan Penduduk Keluarga Negara (LPPKN), serta 51 orang Panel Kaunselor di bawah penyelarasan LPPKN sentiasa bersedia untuk membantu kanak-kanak dan juga ahli keluarga apabila berlaku kes-kes traumatik. Selain itu, Pegawai Psikologi juga membuat lawatan susulan secara berterusan untuk mengembalikan semangat dari aspek emosi, fizikal, mental dan spritual klien agar mereka dapat menangani tekanan yang dialami, menerima realiti dan akhirnya kembali stabil.

Selain itu, KPWKM turut memperkenalkan perkhidmatan Talian Nur yang kini dikenali sebagai Talian Kasih 15999. Talian ini membantu untuk

memudahkan orang awam dan mangsa penderaan kanak-kanak membuat aduan dan mendapatkan khidmat nasihat. Pada bulan November 2010, KPWKM telah memperluaskan perkhidmatan Talian Kasih 15999 dengan mewujudkan talian khusus bagi aduan kanak-kanak iaitu Childline 15999. Talian ini merupakan talian tambahan bagi memberi perkhidmatan kaunseling kepada kanak-kanak dan bertindak sebagai perantara untuk menangani kes penganiayaan kanak-kanak. Sejak dilancar November 2010 hingga Jun 2016, talian ini telah mengendalikan sebanyak 18,965 panggilan bagi kes kanak-kanak.